


Инсонлар ҳақида Аллоҳдан қўрқиш лозим!



14:00 / 10.03.2022 1444

Муҳаммад ибн Аҳмад Муқрий ўзининг «Ал-мухтор мин навадирил ахбор» номли китобида айтади:

«Бир куни Аббосий халифалардан бўлмиш Маъмун қасрининг пешайвонидан туриб бир киши кўмир билан қасрнинг деворига нимадир ёзаётганини кўриб қолди. Хизматкорларининг бирига деди:

- Дарров бориб уни қўлидан тутиб менинг ҳузуримга олиб кел. Деворда нима ёзганини ҳам ўқиб кел!

Хизматкор тушиб уни тутиб олди ва девордаги ёзувни ўқиди. Унда шундай ёзилган эди:

«Эй қаср! Сенда баҳтсизлик ва разолат жамлангандир. Бойқушлар сенинг атрофингда ин қуришибди. Агар бойқушлар сенинг атрофингда эмас, ичингда ин қуришганида эди, ўша кун мен хурсандлигимдан биринчи бўлиб сенга аза очар эдим!».

Хизматкор унга дебди:

-Сени мўъминлар амири чақирайтилар.

Ҳалиги киши деди:

- Аллоҳнинг номини ўртага қўйиб сўрайман, мени халифанинг ҳузурига олиб борма!

Хизматкор деди:

- У киши бизни кўриб турибдилар. Ҳов ана қара!

У ноилож халифанинг ҳузурига борди. Халифа ундан сўради:

- Ҳолингга вой! Нега деворга бундай деб ёздинг?

Деворга ёзган киши деди:

- Эй мўъминлар амири! Қасрнинг ичидаги қанчалик кўп мол борлиги сизга маълум. Бир куни оч ва чанқоқ бўлган ҳолимда қасрнинг олдидан ўтдим. Икки кундан бери овқат емаган эдим. Ўзимча «қани энди бу қаср вайрон бўлса эди, у ердан бирор фойдали нарсани қўлга киритармидим», дедим. Эй мўъминлар амири! Аллоҳ сизни азиз қилсин. Шоирнинг гапини эшитмаганмисиз(насрий баёни):

«Агар бир кишининг давлатида бошқа бирорнинг улуши ёки насибаси бўлмаса унинг йўқолишини орзу қиласи. Буни нафрат ёки адватдан қилмайди, балки ўзининг фойдасини унинг давлатининг йўқолишида кўради!».

Маъмун хизматкорига деди:

- Эй ғулом! Бунга минг динор, овқат ва сув бер!

Кейин ҳалиги кишига деди:

- Модомики, қасримиз биз билан обод экан, ҳар йили келиб шунча пул олиб кетавер!

Инсонлар ҳокимлари ва бошлиқларини кузатиб юришади. Агар ҳокимлари бой бўлиб, ўзлари ҳам бой бўлишса шукр қилишади. Агар ҳокимлари фақир бўлиб, ўзлари ҳам фақир бўлишса сабр қилишади. Аммо тескарисини кўришса ғазаблари қўзғалади. Ҳокимларига қарши ҳар дақиқада қўзғалишга тайёр туришади.

Ибн Холдун роҳимаҳуллоҳ айтганидек, зулм обод жойларни ҳаробага айлантиради.

Хазрати Умар розияллоху анхунинг замонларида қаҳатчилик бўлди. Кишилар оч қолишди. Аммо бирор киши Умар розияллоху анхудан ғазаблангани йўқ. Чунки улар Умар розияллоху анхунинг ҳам ўзлари каби оч қолганларини кўришар ва билишар эди. У зот бир куни минбарда турганларида қоринлари очликдан қулдуради. Шунда Умар розияллоху анҳу қоринларига қараб дедилар:

- Қулдурайсанми, қулдурамайсанми, токи мусулмон фақир-мискинлар тўймагунича сенга ҳеч нарса бермайман!

Инсонлар ватанларини ва бошлиқларини яхши кўрадиган қилиб яратилган. Аммо уларнинг ҳам эҳтиёжлари ва қадри-қиммати бор. Агар уларнинг ҳожати раво қилинмаса, қадр-қиммати поймол қилинса аҳволи ўзгаради, фитрати бузилади. Оч қолган фуқарога, ётоқ топа олмайдиган қочқинга, шифохонада ётадиган жой топа олмайдиган bemorга кучли қўшин ҳам қарши чиқа олмайди.

Инсонлар фуқаро бўлишдан олдин инсон бўлишган. Инсонлар ҳақида Аллоҳдан қўрқиш лозим!

Абдулқодир Полвонов